



Reglament forestal

C u n t e g n

I.	Disposiziuns generalas	4
Art. 1	Intent	4
Art. 2	Principi	4
II.	Administraziun	4
Art. 3	Organisaziun	4
Art. 4	Administraziun e survigilanza	4
Art. 5	Suprastonza communal	4
Art. 6	Gerau d'uaul	5
Art. 7	Selvicultur da revier / menader da menaschi	5
III.	Cultivaziun digl uaul	5
Art. 8	Finamira	5
Art. 9	Programm annual	5
Art. 10	Segirtad da lavur	5
Art. 11	Protecziun dalla lenna	5
Art. 12	Infrastructura	6
Art. 13	Diever dallas vias d'uaul	6
IV.	Products forestals e prestaziuns forestalas	6
Art. 14	Commercialisaziun	6
Art. 15	Venita da lenna	6
Art. 16	Consum intern	6
Art. 17	Lenna da taxa	6
Art. 18	Lenna manecla	6
Art. 19	Pigneuls, dascha per cuvierer	6
Art. 20	Prestaziuns d'economia collectiva	6
V.	Protecziun encunter donns	7
Art. 21	Pasculaziun	7
Art. 22	Fiug	7
Art. 23	Campar	7
Art. 24	Terminaziun	7
VI.	Disposiziuns penalas	7
Art. 25	Cumpetenz	7
Art. 26	Multas	7
Art. 27	Scadenza, mieds legals	7
Art. 28	Obligaziun da denunziar	7

VII. Lenna da taxa	8
Art. 29 Notaziun	8
Art. 30 Dretg	8
Art. 31 Damondas e termins	8
Art. 32 Consigna	8
Art. 33 Pinar e transport	8
Art. 34 Termin da menar naven la lenna	8
Art. 35 Liug da diever / commerci / brat	8
Art. 36 Reclamaziuns	8
Art. 37 Quantitad	8
Art. 38 Fuorma dalla sort	9
Art. 39 Termin da consigna	9
VIII. Disposiziuns finalas	9
Art. 40 Abrogaziun	9
Art. 41 Approbaziun e vigur	9

Sebasond sin art. 54 dalla lescha cantunala d'uaul (LCU) sco era sin art. 38 dall' ordinaziun executiva tier la LCU (OCU) relai la vischnaunca da Sumvitg las suandontas prescripziuns:

I. Disposiziuns generalas

Art. 1 Intent

Il reglament forestal regla l'organisaziun, las incumbensas e las obligaziuns dil survetsch forestal dalla vischnaunca.

Art. 2 Principi

Ils uauls da vischnaunca dueien saver ademplir lur funcziuns da protecziun, d'utilisaziun e dil beinstar public a moda durabla.

II. Administraziun

Art. 3 Organisaziun

La vischnaunca meina in agen survetsch forestal.

Art. 4 Administraziun e survigilanza

L'administraziun e la survigilanza dils uauls communalis ein caussa dalla suprastanza communal. In commember dalla suprastanza ei gerau d'uaul.

Art. 5 Suprastanza communal

1 La suprastanza communal ei responsabla pil manteniment e per la cultivaziun convergenta dils uauls communalis. Ella:

- a) fixescha las directivas dalla politica forestala dalla vischnaunca,
- b) elegia il selvicultur da revier ensemen cun la cumissiun da quen e gestiun,
- c) relai la descripziun dalla piazza e fixescha ils duers e las cumpetenzas dil selvicultur da revier,
- d) approbescha il program annual,
- e) fa il preventiv,
- f) survigilescha la gestiun dil menaschi,
- g) engascha ils luvriers d'uaul e fixescha las cundiziuns da survetsch,
- h) surdat tuttas lavurs forestalas ed ei responsabla per la vendita da lenna,
- i) sa declarar cumpetenzas specialas el rom dall'aleina h) al gerau d'uaul ed al selvicultur da revier,
- k) punescha surpassaments digl uorden forestal communal.

2 Sch'ei vegn tractau ellas sedutas dalla suprastonza communal fatgs digl uaul, ei il selvicultur da revier d'envidar cun vusch consultativa.

Art. 6 Gerau d'uaul

Il gerau d'uaul:

- a) diregia e survigilescha il forestalessar,
- b) promova l'economia forestala e la commercialisaziun dalla lenna en vischnaunca.
- c) representa ils interess forestals en suprastonza communal ed avon la populaziun,
- d) pren part allas uatgas forestalas,
- e) fa la proposta per surdar las lavurs forestalas ch'eiin buca el preventiv e program da lavur sco era lavurs che survargan las cumpetenzas finanzialas dalla suprastonza communal,
- f) visa ils quens dil menaschi forestal.

Art. 7 Selvicultur da revier / menader da menaschi

Il selvicultur da revier vegn engaschus e salarisaus tenor las disposiziuns executivas decisivas dil cantun. El ha l'obligaziun da menar il menaschi forestal tenor las disposiziuns executivas dil cantun e tenor la descripziun dalla piazza.

III. Cultivaziun digl uaul

Art. 8 Finamira

Ils uauls communalis ein da cultivar tenor las disposiziuns fixadas en la planisaziun forestala.

Art. 9 Programm annual

Las lavurs sedrezzan tenor il program annual approbau e tenor il preventiv.

Art. 10 Segirtad da lavur

Lavurs d'uaul astgan vegnir exequidas sulettamein da luvriers scolai corrispudentamein e sulettamein observond las disposiziuns davart la segirtad da lavur digl ISAA (SUVA). Lavurs a tiarzas personas astgan vegnir surdadas ultra da quei sulettamein observond l'obligaziun necessaria d'agir cun quita.

Art. 11 Protecziun dalla lenna

Leu, nua ch'igl ei necessari per motivs fitosanitars (malsogna) e per segirar la qualitat, sto la lenna vegnir allontanada immediat ord igl uaul u vegnir tractada a moda cumpetenta.

Art. 12 Infrastructura

Per cultivar ils uauls communalis eis ei da crear in'infrastructura cunvegnenta che ei da mantener en in bien stan.

Art. 13 Diever dallas vias d'uaul

Il diever dallas vias d'uaul succeda tenor il reglament da traffic dalla vischnaunca da Sumvitg che sebase sin la lescha d'uaul cantunala e federala.

IV. Products forestals e prestaziuns forestalas

Art. 14 Commercialisaziun

La vischnaunca commercialisescha ils products forestals e las prestaziuns forestalas il meglier pusseivel. Ella sa sustener associaziuns cun las medemas finamiras.

Art. 15 Venita da lenna

La vendita dalla lenna vegn fatga tenor ils principis dallas „usanzas commercialas per la vendita dalla lenna svizra“.

Art. 16 Consum intern

La lenna da diever e da brisch che vegn duvrada per baghetgs communalis vegn messa a quen pil prezi da fiera.

Art. 17 Lenna da taxa

La suprastanza communal decide davart las cundiziuns da vendita da lenna da taxa allas persunas cun dretg sin quella.

Art. 18 Lenna manecla

Sco lenna manecla valan lenna secca sidretg u lenna per tiara cun meins che 16 cm diameter en l'altezia dil pèz, sco era roma, scorsa, restonzas da tagl e tocca libra. Il dretg da rimnar lenna manecla ha tgi ch'ei en possess d'ina lubientscha digl uffeci forestal da revier.

Art. 19 Pigneuls, dascha per cuvierer

Ils pigneuls e la dascha per cuvierer astgan vegnir tagliai sulettamein sut survegionza forestala. Il selvicultur da revier mira ch'ei vegni pinau e consignau en uorden e cunvegnentamein.

Art. 20 Prestaziuns d'economia collectiva

Ils cuosts per las prestaziuns d'economia collectiva ein da cumprovar e da metter ton sco pusseivel a quen als gudiders. Tut ils recavs per las prestaziuns d'economia collectiva e per utilisaziuns secundaras dueien vegnir scretts dabien al quen forestal.

V. Protecziun encunter donns

Art. 21 Pasculaziun

L'utilisaziun dils uauls sut pasculaziun ei da reglar en cunvegnyentscha cul survetsch forestal en reglaments da pasculaziun u en projects per separar igl uaul e la pastira.

Art. 22 Fiug

Igl ei lubiu da far fiug egl uaul u en vischinonza da quel sulettamein, sch'ei exista buca prighel d'incendi.

Art. 23 Campar

Igl ei scumandau da campar egl uaul.

Art. 24 Terminaziun

Ils tiarms e las lingias da cunfin ein da marcar e da mantener en ina fuorma adattada e cuzzeivla.

VI. Disposiziuns penalas

Art. 25 Cumpetenzza

La supraszonza communal ei cumpetenta per tuts surpassaments encunter igl uorden forestal, aschilunsch che quels ein buca sutta mess alla cumpetenzza d'ina outra istanza.

Art. 26 Multas

Ils surpassaments encunter quest reglament forestal vegnan puni cun multas da frs. 100.-- entochen 5'000.--, ultra dall'obligaziun da surprender l'indemnisaziun cumpleina dil donn.

Art. 27 Scadenza, mieds legals

1 Las multas e l'indemnisaziun dil donn ein da pagar alla cassa communal enteifer in meins suenter la consignaziun dalla disposiziun dalla multa.

2 Encunter las multas dadas dalla suprastonza communal ha il puniu il dretg da recuorer alla dertgira administrativa dil cantun Grischun enteifer 20 dis.

Art. 28 Obligaziun da denunziar

Las personas officialas ein obligadas da denunziar ils surpassaments.

VII. Lenna da taxa

Art. 29 Notaziun

Sco lenna da taxa vala la lenna da brisch che vegn vendida dalla vischnaunca per in prezi reduciu.

Art. 30 Dretg

La lenna da taxa vegn vendida a tuts domiciliai en vischnaunca.

Art. 31 Damondas e termins

Damondas per obtener lenna da brisch ein d'inoltrar agl uffeci forestal tochen ils 31 da mars digl onn current.

Art. 32 Consigna

La lenna da brisch ei da pinar normalmein ord ils tagls ordinaris u ord utilisaziuns sforzadas. La consigna naven dalla cuscha ei scumandada.

Art. 33 Pinar e transport

La vischnaunca ei responsabla pil pinar e pil transport dalla lenna da brisch. Sch'ils re-tscheviders gidan a pinar e transportar la lenna, eis ei da menar las corrispundentas gliestas da paga, aschia ch'els ein segirai encunter accident via vischnaunca tras igl ISAA (SUVA).

Art. 34 Termin da menar naven la lenna

Lenna ch'ei buca vegnida menada naven enteifer il termin fixau sil quen, croda senza restituziun alla vischnaunca.

Art. 35 Liug da diever / commerci / brat

La lenna da brisch astga vegnir duvrada sulettamein sil territori dalla vischnaunca d' acquist. Il commerci cun lenna da brisch ei scumandaus.

Art. 36 Reclamaziuns

Eventualas reclamaziuns concernent quantidad e qualidad ein da far a scret avon che la lenna vegn menada naven, sil pli tard denton 15 dis suenter la repartiziun e quei agl uffeci forestal da revier. Suenter quei termin croda, cun excepziun da munglaments zuppai, la responsabladad dalla vischnaunca.

Art. 37 Quantitad

Il selvicultur da revier fixescha mintg'onn la quantidad totala d'acquist, risguardond la planisaziun da menaschi. Quella quantidad vegn repartida sin las damondas inoltradas.

Art. 38 Fuorma dalla sort

La consigna succeda en fuorma da blocca sper vias d'uaul carrablas. Sch'il retschevider giavischa che la lenna vegni cavigliada e furnida a casa, succeda quei pils cuosts effectivs.

Art. 39 Termin da consigna

Il termin da consigna vegn fixaus dil selvicultur da revier e communicaus als retscheviders.

VIII. Disposiziuns finalas

Art. 40 Abrogaziun

Quest reglament remplazza il regulativ forestal dils 05 da fevrer 1982.

Art. 41 Approbaziun e vigur

Quest reglament ei vegnius approbaus dalla radunonza communal dils 06 d'avrel 1998 e passa immediat en vigur.

Il president communal:

Igl actuar communal:

sig. Francestg Degondasig. Bernard Bearth

Approbau dalla Regenza dil cantun Grischun tenor conclus dils 02-06-1998,
protocol nr. 1119

En num dalla Regenza

Il president:

Il cancelier:

L. Bärsch

Dr. C. Riesen